

Neijohrsgedonke

Wenn merr su e paar Daach im neie Johr erum hott donn dut merr zu dene Leit, die merr leide kann unn ess ersde Mol in dene Daache sehe dut, noch Prost Neijohr saache unn alles Gute winsche. Su iss merrs gonge die letzd Woch beim Oikaafe in de Kolonnade.

No ja, oikaafe, dess mächt die Fraa unn isch due entweder de Waache schiewe odder derweil enn Kaffee drinke. Unn donn kimmt schunn emol e Fraa odder enn Monn uff oom zu unn dut oom die Hond gewwe unn e bissi schwätze was immer doodemett oofonge dut: Bissde gut ins neie Johr kumme?, unn wenn de gesund unn munter bist seesde donn: Ja, mir sinn gut enoikumme, unn ihr doch aach?

Dess sinn su Zeremonie, die sich jedes Johr widderhole dun unn dess iss schee. Denn wer su frächt, duts gut medder moone unn mett doine Frau unn doine Kinner unn Enkel unn dess iss ebbes was merr nitt mett Geld bezahle kann, weil irschem wie hott merr donn dess Gefiehl, merr iss ooner vunn de alde Flerschemer unn vunn de junge Flerschemer, die merr iwver die alde Flerschemer kennegelernt hott.

Unn ab unn zu werdd merr aach emol oogesproche uff Sache, die merr emol gesaad hott unn die jemonnd onnersders gefalle hawwe. Su iss merrs gonge die vorsch Woch, als e Fraa uff mich zukumme iss, mir die Hond gewwe unn gesaad hott, dassu Oofong November im letzde Johr e Gebabbel zwischem Schorsch, emm Karl unn mir mitkriehd hott, wie merr uns iwver su Eckbänk unnerhalle hawwe. Dess, hott die Fraa gesaad, habb isch merr gut behalle unn habbs aach gleich weiderverzähld, weil dess mett su Eckbänk dehoom iss merr su rischdisch ins Gemiet gonge.

Wie isch dess enn Daach späder moim Kummbeer Schorsch verzähld habb, hott der gefroochd: Dess iss doch bestimmt e alt Fraa gewese, odder?

Naa, habb isch ze Antwort gewwe, su alt war die nitt, awwer doch nimmi su gons jung.

Siehsde, moont de Schorsch, die Fraa iss wie du. Du siehst aach dess Gemiedliche in eiem Haus innere Eckbonk odder in emm onnere Möbelstick, awwer dess Kättche unn isch, mir sehe dess Gemiedliche in de Fotos, die iwverall bei uns onn de Wänd hänge unn wo unser gons Familie mett Kinner unn Enkel bis hie bei die Großeltern unn dere ihr Eltern ze sehe sinn. Die Fotos sinns, die isch unn die Fraa nie unn nimmer eweckdue wolle. Wie mir unser Eckbonk sellemols fortgewwe hawwe, dess hott uns nitt su laad gedue.

Schorsch, saach isch, egal ob meddere Eckbonk odder mett Fotos onn de Wänd, merr muss sich wohlfiel. Isses nitt schee, egal obde nor drei Stunn odder drei Woch fort gewese bist: du schließst die Hausdier uff, ziehst doin Monndel odder doi Jack unn doi Schuh aus unn bist dehoom.

Ja dehoom, seet de Schorsch, dess iss merr, ob ooner im dreißischde Stock in emm Wolkekratzer wohnt, in emm Zelt in de Mongolei oder unnerere Moobrick in Fronkfort. Merr setzt sich hie, guckt sich um unn waaß, merr iss daheim, zu Hause, dehoom.

Was sinn dess ferr scheene Werrder, saach isch, wer die saache kann, dem giehts Herz uff.

Ja, seet de Schorsch, schunn immer unn aach im neie Johr.

Eiern Honnes